

宋・朱

震撰

易學叢
書續編

漢
上
易
傳
(下)

附卦圖、叢說

廣
文
書
局
印
行

中華民國六十三年九月初版

易學叢
書續編

漢上易傳

附卦圖、叢說

裝精上下定價新台幣：四百一拾二元

版權所有
不准翻印

撰者 朱

發行人 王

道 榮

發行所

廣文書局有限公司

臺北市羅斯福路二段九號之三
郵政劃撥二一九九號
電話三〇六六號

經銷者

全國各大書局

內政部出版業登記證內版台業字第一三二四號

周易下經豐傳卷第六

翰林學士左朝奉大夫知制誥兼侍讀兼資善堂翊善長林秘閣國男良邑三伯賜紫金魚袋朱震集傳

三三

離下震上

豐亨

王假之勿憂宜日中彖曰豐大也明以動故

豐王假之尚大也勿憂宜日中宜照天下也日中則昃月盈則食天地盈虛與時消息而況於人乎況於鬼神乎

豐泰九二之四也乾變離明坤易震動明以動則亨亨則大豐大也故曰豐亨彖曰豐大也明以動故豐此合兩體言致豐之道也假至也乾在上之象王者明以動其道亨乃能至於豐大九二上行至四王假之也王假之者尚大也四海之廣萬物之衆无一物不得其所无一夫不獲自盡非小道之所能至故曰王假之尚大也此以九四言乎豐之才也二四失位爲憂離下有伏坎爲加憂離見坎伏勿憂也然明以動勿憂其至於大也進而至於五則得位

矣故曰勿憂此以九二之四言乎豐之才也離日震動日當五爲中日動於下升于東方明動不已九四進五何憂乎不至於中而无所不照哉日之大明萬物咸覩宜照天下也乾爲天五離應二照天下也太玄曰日正于天何爲也曰君子乘位爲車爲馬車軫馬駟可以周天下故利其爲主也宜日中則正于天利其爲主之謂也故曰勿憂宜日中宜照天下也此以九二進而至五言乎豐之才也五復降四坎離象變離成兌日在西日中則昃也坎成兌巽兌爲口月闕於巽辛月盈則食也四乾陽長於震二坤陰生於離陽長盈也息也陰生則盈者虛消者息矣有天地然後有人有鬼神鬼神往來於天地之間者也豐大之時所宜憂者不在乎未中而常在乎日之旣中也何則日中俄且昃矣月盈俄且食矣盈者必虛息者必消天地之所

不能違者時也而況天地之間聚而爲人散而爲鬼神乎
明動不已未有能保其大者也保此道者其唯中乎故曰
日中則昃月盈則食天地盈虛與時消息而況於人乎況
於鬼神乎此復以坎離升降明豐之戒也在卦氣爲六月
故太玄準之以大廓

象曰雷電皆至豐君子以折獄致刑

雷電皆至萬物豐大之時豐則生訟故君子法其威明並
用以治刑獄電明照也所以折獄雷威怒也所以致刑折
獄者以正折其不正初二三正也而二有伏坎爲獄不明
則枉者不伸致刑者刑其不正而已四五不正也兌爲刑
殺不威則小人不懼噬嗑其明在上君子在上之事也故
爲明罰飭法豐用明在下君子在下之事也故爲折獄致

刑

初九遇其配主雖旬无咎往有尚象曰雖旬无咎過旬災也
 泰九二之四成豐故九四爲豐之主配者陰陽相匹孟氏
 鄭氏本作妃嘉耦曰妃妃嬪也亦匹配之意初九九四陽
 也六五陰也初與四不應六五亦无應四雖不應初可因
 四爲主而配五陰陽相配故九四爲配主遇者不期而會
 四不應初而初九主之不期於會而會故曰遇其配主旬
 均也初九九四均也然明動相資致豐之道非明則動无
 所之非動則明无所用是以均而无咎无咎者初九以正
 相資也初九遇四往而相易以致用則初得尚于五而豐
 之道上行矣尚亦配也與尚于中行之尚同故曰往有尚
 也夫初九遇九四所以得尚于五者以正相資而成豐譬
 之共難則仇怨協力勢使之然若妄動不正過四而有其
 位明動不相爲用過旬也過旬則失其配主往而无所尚

與坎險相會災至矣豐道云所以災也故曰過旬災也初動有小過象故曰過旬謂之均者六甲周行乘八節其數四百八十而成鈞鈞勻也初九離納已九四震納庚自己至庚凡十日十日周而復始故訓勻

六二豐其蔀日中見斗往得疑疾有孚發若吉象曰有孚發若信以發志也

震巽爲草二在草中有周匝掩蔽之意故曰蔀陸震曰歷法凡十九年閏分盡爲一章四章凡七十六年爲一部五節周六甲凡三百八十年而歷象小成豐蔀之名蓋寓此意離目爲見豐爲日中五兌伏艮艮離爲天文賁之象也震少陽其策七震爲動有星在上動於中而其數七斗之象也二有至明中正之才以豐時遇闇弱不正之君猶當晝而夜至於見斗其昏甚矣坤爲冥晦闇之象五旣不能

下賢二自往見反得疑疾自往者亦取疑之道異爲不果
六五陰失位疾也然二五相應之地有孚之理二積中正
不已盡其誠信以感發其志則五動而應之乃吉易傳曰
苟誠意能動雖昏蒙可開也雖柔弱可輔也雖不正可正
也古之人事庸君常主而克行其道者已之誠上達而君
見信之篤耳

九三豐其沛日中見沫折其右肱无咎象曰豐其沛不可大
事也折其右肱終不可用也

沛古本作旆王弼以爲幡幔震爲玄黃兌金斷之旆也幡
幔圍蔽於內故豐其沛沫斗後小星微昧之光子夏傳及
字林作昧三之上成艮艮離爲天文星在斗之後隨斗而
動者昧也三明極而剛正處豐之昧上六闇極矣猶日中
當明而反見斗後之星其闇尤甚異爲事陽爲大伏坎爲

可豐尚大也豐其施往見則不明故退而守正以不可大
事故也兌爲右伏艮爲肱兌折之折右肱也上六闢極不
可用之以有爲從之必罹其咎故自折其右肱示終不可
用則无咎

九四豐其蔀日中見斗遇其夷主吉象曰豐其蔀位不當也
日中見斗幽不明也遇其夷主吉行也

四動成坎離光明也不動成震巽震巽爲草掩蔽周匝蔀
也四在蔀中處不當位自蔽其光明故曰豐其蔀兌有伏
艮四應離初艮離爲天文震動也其策七有星動於上而其
數七斗之象離目爲見四處不當位又不能變若動而交
初則幽者明矣坎爲隱伏故也以此處豐猶日中之時而
反見斗處幽暗而已不明故曰幽不明也九四不正其不
明自取之異於二三矣夷主者謂初也九四與初九均爲

陽而上下不敵四忘其勢下夷於初四者初之所主也故
曰夷主初正正則吉初九助四而上行以資其明吉行也
易傳曰居大臣之位得在下之賢同德相輔其助豈小也
哉

六五來章有慶譽吉象曰六五之吉有慶也

六五屈體來下於四與之共天位九四之明上行之五相
錯成離坤離爲文章者文之成也九四上行則初應四二
應五三應上六爻並用成豐大之慶五屈已下賢四志行
乎上人自譽之兌爲口譽之者也五得正吉也

上六豐其屋訃其家闕其戶闕其无人三歲不覲凶象曰豐
其屋天際翔也闕其戶闕其无人自藏也

自二至上體大壯棟宇之象上六動陰變陽爲大豐其屋
言自處高大也二爲家震巽爲草豐盛周匝以掩蔽之訃

其家言所居不明也自處高大所居不明以高亢自絕於人如飛鳥務上翔於天際豈復能降哉上動成離離爲飛鳥乾爲天在外卦之際天際也豐之時九四忘其敵已下資初九三與上六正應也其能忘乎故三自下往庶幾發其昏暗知處豐之道九三離目爲見往闕之坤戶闔而不應闕寂乎其无人聲太玄所謂外大抗中无人也三於是退而自藏於坎中乾爲歲三自四歷三爻三歲不覲也豐其屋蔀其家自絕於人也三歲不覲人絕之也上六動不正凶也不直曰凶者有應焉猶異乎下交也至于三歲不覲人亦厭之而凶至矣闕小見也覲私見也自上六言之謂之窺陰爲小也自九三之上言之謂之覲私見也私不正也



離上

旅小亨旅貞吉彖曰旅小亨柔得中乎外而順乎

剛止而麗乎明是以小亨旅貞吉也旅之時義大矣哉

旅否之變也剛當居上柔當居下六居五失其所居而在外旅也然六居五柔得中矣得中則其柔不過得爲旅之中道易傳曰中非一揆旅有旅之中也柔得中則能順乎上下之剛不爲剛所揜而小者亨順乎剛而柔失中旅道窮矣坤順也君子入國問禁興之日從新國之法順乎剛也故曰柔得中而順乎剛此以六五言旅小亨也九居三未爲失其所居也然則自五而反居於下猶爲旅也居三成艮屈其剛而止於下自謙屈之道也雖止乎下矣然九三正止而不失其正上麗乎離之明君子之居是邦也事其大夫之賢者友其士之仁者麗乎明也正然後能麗乎明不正人將拒我矣正則吉故曰止而麗乎明此以九三言旅貞吉也旅難處也旅如六五柔得中乎外而順乎剛

在我者不失已矣乃可以小亨旅如九三止而麗乎明在彼者亦不失人矣乃可以貞吉是以旅一也而再言之易傳曰旅困之時非陽剛中正有助於下則不能致大亨如卦之才則可以小亨得旅貞而吉也四方固男子之事居者必有旅也顧處之如何耳夫子歷國應聘嘗去父母之邦矣去他國矣欲浮于海居九夷矣蓋得旅之時義也旅之時不一而義者時措之宜知其時而不知其宜不可也非大人孰能盡之故曰旅之時義大矣哉在卦氣爲四月故太玄準之以裝

象曰山上有火旅君子以明慎用刑而不留獄

山上有火明而止止而不處旅也君子之用刑也雖明而止故明而慎於用刑雖止而不處故亦不留獄明者或不慎慎者或留獄失旅之象也離有伏坎爲獄兌爲刑殺艮

止慎也

初六旅瑣瑣斯其所取災象曰旅瑣瑣志窮災也

鄭曰瑣瑣小也艮爲小動而之四復成艮小之又小瑣瑣也初六小人之旅卑柔而不中正恃應而求於四者頽墜其細已甚故曰旅瑣瑣四巽極而躁火性炎上不能容初艮止也厭止妄動往而復止人亦厭之志窮也坎險災也志窮遇險斯其所取災也艮爲手有求取之象楚申侯是已曰斯曰其者初四上下皆有艮手取災之象故指兩爻言之

六二旅即次懷其資得童僕貞象曰得童僕貞終无尤也

艮止也二得位止而得位即次舍也離兌爲羸貨貝資財之象二巽爲入懷其資也童僕一本作僮僕艮爲少男初卑陰賤二在上畜之童僕也初於二得童僕貞也童僕貞

則二親信之而不疑旅在下柔而中正即次所遇而安也懷其資得三四五之助也又得童僕貞而下承之旅如是多助矣故動而之外終无尤之者五兌爲口尤之者也初六不正而曰貞者貞於二也貞於主人二巽東南主人位也歸妹九二利幽人之貞貞於五也童僕貞然後次舍可止資貨可有夫子曰審其所以從之之謂貞也

九三旅焚其次喪其童僕貞厲象曰旅焚其次亦以傷矣以旅與下其義喪也

艮止也三得位止而得位次舍也巽木離火焚其次也九三在旅而過剛四五之所不與則失其所止有焚其次之象兌爲毀傷也旅失其所止亦可傷也初艮爲童僕九三既失其所止以旅之故乃巽而與下失尊卑之宜初三易位初失其正喪其童僕貞也所以喪者爲旅之義剛柔皆

失中旅如是寡助危矣六居三不正危之道

九四旅于處得其資斧我心不快象曰旅于處未得位也得其資斧心未快也

二三止而得位爲次舍四巽爲入而未得位行者處而已入對出言之爲處九四非安處也故曰旅于處離兌爲羸貝資也離爲兵巽木貫之斧也得其資以爲利得其斧以爲斷上得乎五下得乎三之助矣九剛明之才而處四履謙能下善處乎旅故得上下之利有資貨焉有器用焉雖不若六二亦曰得其所矣然未得位也上不足以發五之志下不足以致九二之賢雖得資斧未免爲旅人故我心不快兌爲決中爲心四進而上道行于五而二應則快矣孟子曰久於齊非我志也

六五射雉一矢亡終以譽命象曰終以譽命上逮也